



RONDIĆ (Kambera) EDIB, dipl.inž.geod.

U prisustvu rodbine, velikog broja prijatelja, saboraca i poznanika uz dužne počasti sahranjen je 18.04.1994.godine na šehidskom groblju Kovači naš dragi Edib (Kambera) Rondić, borac Armije BiH i nosilac ratnog priznanja "Zlatni ljiljan".

Uključio se je u odbranu naše domovine od prvog dana agresije. Proveo je ramazanski Bajram 1992.godine u svom Prijepolju, sa roditeljima i najmlađom kćerkom, da bi se preko četničkih barikada, nakon više pokušaja, ipak uspio vratiti u Sarajevo. Uključuje se u odbranu Bistrika i Širokače, postaje Komandir izviđačko-diverzantske čete I Sandačke brigade, da bi u akciji u noći 31.08/01.09.1992.godine hrabro izgubio svoj mladi ali veoma častan i uspješan život.

Rodio se je u Prijepolju 30.01.1956.godine od oca Kambera i majke Azemine. Bezbrizno djetinjstvo, osnovno i srednje obrazovanje završio je u ovom divnom mjestu na obalama Lima. Pripada prvoj generaciji diplomiranih inženjera Geodezije na Univerzitetu u Sarajevu. Izuzetno je bio dobar student i najmlađi diplomant.

Stručnu karijeru započinje u Sekretarijatu za urbanizam opštine Prijepolje, nakon čega dolazi u Geodetski zavod u Sarajevu gdje je bio neposredni izvodač, rukovodilac RJ Inženjerska geodezija i rukovodilac Razvojne službe odakle prelazi u Upravu za geodetske i imovinsko-pravne poslove Republike Bosne i Hercegovine na radno mjesto zamjenika direktora, na kom radnom mjestu ga je zatekao rat. Iako je relativno kratko radio na ovom mjestu, učinio je zaista mnogo, gledano dugoročno, za geodetsku struku u cijelini. Zakoni koji su usvojeni u tom periodu stvarali su uslove za okončanje premjera i uspostave katastra nekretnina naše republike do 2000 godine. Geodetski zavod i Krajina premjer trebale su nastaviti, uz obezbjeđen solidan standard svojih radnika, dalje modernizovanje procesa proizvodnje. Trebala je uslijediti i reorganizacija republičkog i opštinskih organa nadležnih za geodetske i imovinsko-pravne poslove.

Našeg Ediba znamo i kao neumornog aktivistu u Savezu GIG-a grada Sarajeva, čiji je bio i predsjednik, kao i u Savezu GIG-a Bosne i Hercegovine. Bio je neposredni organizator brojnih susreta,

drugarskih večeri i stručnih savjetovanja geodeta.

Uz sve ovo našao je vremena za dalje školovanje i bio je pri završetku postdiplomskog studija.

Supruga Sabaheta, kćerke Edina, Edita i Emina kao i mnogobrojna rodbina mogu biti ponosni na svog i našeg Ediba.

Edibov lik i djelo, njegova hrabrost ostat će svima nama u trajnoj uspomeni.

*Mirsad Bakšić*